

REGIONAL NEWS

HEADLINES

1. Tuialhthei man sang duh loh lantir nan naktukah Mizoram Commercial Vehicle Union (MCVU) hnuaiia lirthei hrang hrang an ding dawn.
2. Sorkar ruahmanna in naktukah Aizawl khawpui chhungah Mizoram State Transport Bus 14 a service tir ang.
3. Sorkar laipui Agriculture & Farmers' Welfare hmalakna buhtun chin uar inzirtirna vawiin khan Aizawlah neih a ni.
4. Prime Minister Narendra Modia chuan vawiin khan BRICS Summit hmang turin Kazan a thleng a. Russia a cham chung hian President Vladimir Putin nen an inkawm dawn bawk.

<><><>

MCVU

Mizoram Commercial Vehicle Union (MCVU) chuan tuialhthei man sang vanga nawrh an tum chu kaltlang pui an tum a, tiamchin awm lova nawrh an tum erawh thulhin, naktukah lungawilohna lantirin ni khat an ding ang.

Naktukah zing dar 6 atanga tlai dar 6 thleng an ding dawn a, hemi chungchangah hian vawiin khan MCVU hruaitu te chuan Aizawl Press Club-ah Chanchinbu mite an kawm a. MCVU President Pu PC Malsawma chuan, nawrh an tum chu a tirah chuan tiam chin awm lo ti mahse Central YMA Rorel Inkawm leh Kohhran Inkawmpui a awm dawn avangin ngenna an dawng tih a sawi a, hei vang hian ni khat atan chauh nawrh an tum ta tih a sawi a ni.

MCVU hruaitu te chuan Mizoram kawngpui chhiat nasat ber ni a an hriat thu sawiin state pawn atanga Mizoram pan luhna mai bakah tualchhung kawng a chhe nasa a, tuialhthei man a sang ta bawk chuan nghawng a nei lo theilo tih sawiin, chawibelha tlan ai chuan loh theih lohna vanga thil phurh man tih san a ngai a nih pawhin hrethiam turin Mipui an ngen nghal tih an sawi bawk a ni.

MCVU President Pu PC Malsawma chuan Mizoram sorkarin Petrol man litre khatah cheng nga leh pawisa 56 in a ti pung leh, Diesel man cheng sarih leh pawisa 76 a tihsan chu vawi lehkhata a punna atan chuan a sang mah mah an ti a, tunlai Mizoram kawng dinhmun nen a in mil lo tih an sawi bawk a ni.

Lungawilohna lantir an huaihawt hi Hriat theih chinah - Mizoram Taxi Assn, Aizawl Two Wheeler Taxi Assn, All Mizoram Commercial Tipper Assn, Mizoram Indane Drivers Welfare, Mizoram Distributor Assn, Champhai District Auto Rickshaw Owner Assn, Serchhip District Truck Owner Assn, Leitan Auto Rickshaw Welfare te chuan an thlawp dawn lo a ni.

Hetihlai hian Home minister Pu K. Sapdanga chuan, vawiin tlai khan Mizoram Commercial Vehicle Union-te chu nuar lo turin a ngen nawn a. Chanchinbu mite a kawmnaah Pu K. Sapdanga chuan Mizoram Commercial Vehicle Union chu an nuar lui a nih chuan Aizawl khawpuiah Mizoram State Transport Bus an service dawn a ti a. Two

Wheeler Taxi leh Four Wheeler Taxi tan, an nawrh chung chuan intlan chhawk a ngaih loh tur a sawi.

Home Minister chuan Commercial Vehicle Service duhte himna an ngaihtuah tur thu leh, STA permit nei an dilnaa an intiamna zawm lote tan Permit kawl reng a rem loh mai thei tih a sawi bawk a ni.

Naktuka Aizawl khawpui chung service turin Transport Dept chuan MST Bus 14 a tirchhuak dawn a, Mizoram Sorkar duhdan angin ruahmanna siam a nih thu Transport Dept thuchhuah chuan tarlangin, Bus te hi zing dar 7:30 atanga tlai lam dar 5 thleng an service ang a, minute 20 dan zelah serial number indawt danin an chhuak ang.

<><><>

MILLETS PROMOTION

Sorkar laipui Agriculture & Farmers' Welfare hnuai hmalakna 'Promotion of Millets in India' chu vawiin khan, North Eastern Regional Agricultural Marketing Corporation Limited (NERAMAC) butsaihin Mizoramah hman a ni.

Buhtun ching uar tura inzirtirna hi Aijal Club-ah hman a ni a, Agriculture minisiter Pu PC Vanlalruata chuan India sorkar chuan Buhtun chin chu a ngaipawimawh hle a ti a, Mizoramini hetiang inzirtirna hun a dawng thei chu lawmawm a tih thu a sawi bawk.

Agriculture Minister Pu PC Vanlalruata chuan Mizoram sik leh sa nena inmil tak Buhtun chu chin uar a pawimawh thu a sawi, tun dinhmunah Mizoram sorkarin hemi atan hian hmalakna bik la nei lo mah se, sorkar laipuiin a ngaihpawimawh avangin hmalakna pawh awm chho tura a beisei a ni a ti.

Aijal Club-ah hian Buhtun atanga siam chhuah thil chi hrang hrang bakah Mizo siam eitur zawrh chhuah nghal a ni a, Buhtun chin uar inzirtirna hi naktukah hman chhonzawm a ni ang.

Buhtun chungchang kan corr report lo ngaithla ang.

<><><>

MNF

MNF Party President Pu Zoramthangan Lengpui Airport chu Indian Airforce kutah Mizoram Sawrkarin pek a tum chuan MNF chuan a tawp thlengin an do dawn, a ti.

Aizawla MNF Office, Mizo Hnam Run-ah MNF din champha vawi-63 lawmna ah he thu hi sawiin Pu Zoramthanga chuan Lengpui Airport chu Mizote nunna hnar, ram dang nen inpawhna a ni a. Ramri buai chungchang leh Covid avanga harsatna tawh thu ah te a tangkai thu sawiin, Silchar kawng a ping a, Rel kawng a pin changa a buaithlak zia hriat a ni tawh a, chuvangin Airport hi midang kutah hlan a remlo a ti a. NGO, Political Party, Kohhran leh ngaihtuahna fim tak hmang phak Thangtharte pawhin an remtih a ring lo tih a sawi bawk.

MNF President chuan, kum khat em pawh an sawrkar hma a ZPM sorkar chu sum leh pai harsatna avanga an buai zia sawiin, tun ang zela sawrkar mek hi an kal chuan, rei an sawrkar lovang a ti.

MNF chu 'Pathian leh kan ram tan' tih thuthlung neia din a nih avangin, Mizoramah Party 30 chuang zet lo zuihral tawh karah Pathianin kum 63

an din champha a hruai thleng a, Pathian chuan a hruai zel dawn a ni, a ti.

MNF din champha vawi 63-na lawmnaah hian Martar-te pualin ngawi renga dingin minute 1 hun hman a ni a, Mizoram hmun hrang hrangah an remchan dan angin MNF Party chuan he hun hi an hmang a ni.

MNYF Headquarter chuan MNF Din champha vawi - 63 na pual in Mizo Hnam Rún a MNYF Room ah Ṭhalai 51 in Thisen pe in Mipa 43 leh hmeichhia 8 an ni.

MNYF President Pu Robert Romawia Royte chuan MNF party thil tum te leh mamawh tu te tana thisen pek chu a inhmeh tih a sawi a ni.

<><><>

MPYCC

Mizoram Pradesh Youth Congress Committee chuan Education Department hnuai Samagra Siksha Mizoram leh Tharthilthlentu Entrepreneurship and MSME Support Society (TiLi) in 'Project Intodelh Inzirtir a 2024-2025' atana thawh dunna an ziah chungchanga dik lo taka pawisa in siam a awm tih sawiin, hemi chungchang chhui turin Lokayukta-ah lehkhah an thelut.

MPYCC tarlan danin, kumin July ni 1 khan Mizoram sawrkar Education Department hnuai Samagra Shiksha Mizoram leh Tharthilthlentu Entrepreneurship and MSME Support Society (TiLi) te chuan cheng nuai 59 hmanna tur 'Project Intodelh Inzirtirna 2024-2025' atan inremna an ziah a. Agreement-ah hian Education Minister, TiLi neitu leh Samagra Shiksha hotuten hming an sign a ni.

He Project hi an ruahman dan chuan sawrkar School 10, High School 5 leh Higher Secondary School 5 thlanchhuah a, chungah school zirlai naupang te hnenah chuan Project Intodelh kalpui tur ani a, Central leh State Fund 90:10 pattern hmanga thawh tur a ni a, he Project ah hian guideline in a phut angin Tender chhuah a ni lo, an ti a, TiLi hi ZPM Spokesperson u fapa ta a ni tih sawi bawkin hetia party mi induhsak a ni lovang tituten danin a phut anga Tender leh Quotation pawh chhuah lova project lian leh pawimawh tak, sum tamtak awmna Advance Payment cheng nuai 23 lai mai an inpe mai hi a dik lovin induhsakna uchuak tak an kalpui a ni an ti.

<><><>

PM

Prime Minister Narendra Modia chuan vawin khan BRICS Summit hmang turin Kazan a thleng a. Russia a cham chung hian President Vladimir Putin nen an inkawm dawn bawka. Tun tum Summit ah hian thupui atan Strengthening Multilateralism for Just Global Development and Security tih chu hman a ni.

Russia-a India Palai Vinay Kumar chuan Akashvani News a hrilh danin khawvel ram hruaitute tan BRICS Summit hian khawvel thil thleng pawimawh tak tak sawihona hun a siam sak dawn a ni.

Russia-a Prime Minister zui tu kan Correspondent report I lo ngaithlang.

<><><>

RBI

RBI Governor Shaktikanta Das chuan sawrkar kum 2024-25 ah ram sum dehchhuah chu zaa 7.2 in a thang dawn a ti. RBI in thlatina bulletin a tihchhuahah he thu hi tarlangin Pu Das-a chuan India hmasawna chu nghet takin a kal a ti a. Sum hmanchhuah leh lakluh lamah a tha zawngin ram a kal mek a ti a. Agriculture leh thingtlang lama sum dehchhuah pawh a pung dawn a ti a. Sawrkar laipui leh state sawrkar sum hman pawh a tha chho telh telh niin a sawi a. Thil man san dan chhutna Consumer Price Index (CPI) chu 2024-25 chhungin zaa 4.5 a ni dawn niin a sawi bawh a ni.

<><><>

WATER

President Draupadi Murmu chuan vawiin khan National Water Awards 2023 chu New Delhi-ah a sem. He award hi then then kuaa then niin lawmman dawng tu hi 38 an awm a. Heng zingah hian state, district, village panchayat, Urban Local Body, Water User Association leh Civil Society ti thate hnenah award hi hlan a ni.

Thusawiin President Murmu-i chuan sawrkar chuan ramchhunga thingtlang khua chenna in zaa 78 ah jal Jeevan Mission hnuaiah tui herh haw tur a pe tawh a ti a. He Mission hi kum 2019 a bul tan anih lai khan zaa 17 chauhin tui hi an la dawng a ni a ti bawh.

Vawiina award semah hian Odisha chu pakhatna a ni a, Uttar Pradesh chu pahnihna niin Gujarat leh Puducherry ten pathumna an hauh a ni.

<><><>